

BOSNA I HERCEGOVINA  
Federacija Bosne i Hercegovine  
Tuzlanski kanton  
OPĆINA GRAČANICA  
OPĆINSKO VIJEĆE

Broj predmeta: 01-05-01839-2014  
Broj akta: 01EH-001  
Gračanica, 30. 06. 2014. godine

Z A P I S N I K  
SA VANREDNE SJEDNICE OPĆINSKOG VIJEĆA  
GRAČANICA

Održane dana 17. 6. 2014. godine u sali za sjednice nove zgrade Općine Gračanica, sa početkom u 11.00 sati.

Vanrednoj sjednici je prisustvovalo 28 članova Općinskog vijeća Gračanica. Odsutne su bile Ahmetašević Jasenka i Osmić Mirsada.

Sjednicu je otvorio i istom predsjedavao Edin Ibrišević, predsjedavajući Općinskog vijeća Gračanica, zajedno sa zamjenikom Gazibegović Seadom i sekretarom Općinskog vijeća Mujačić Zehrom.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Općinskog vijeća Gračanica sjednici su prisustvovali i: Općinski načelnik Nusret Helić, Azra Mustajbašić, šefovi službi za upravu, Aida Hodžić, Zijad Dedić i Mustafa Bajić, predsjednici komisija koje su radile na terenu po pitanju procjene štete od vremenske nepogode, Nermina Trutović, Muhibija Memić, Husein Devedžić, Asim Arnaut, Samed Topčagić, Ibrahim Ahmetagić, Senad Kulić, Advija Gazibegović, poslanik u Skupštini TK Džemal Jukan, te predstavnici sredstava informisanja.

Jedina tačka dnevnog reda vanredne sjednice glasi:

1. ODLUKA O USVAJANJU ZBIRNOG IZVJEŠTAJA O PROCJENI NASTALIH ŠTETA OD PRIRODNE NEPOGODE-POPLAVA I KLIZIŠTA NA PODRUČJU OPĆINE GRAČANICA U PERIODU OD 05. 05. 2014. DO 16. 06. 2014. GODINE

Obrazloženje po prijedlogu Odluke i zbirnog izvještaja dao je Općinski načelnik, Nusret Helić:

“Poštovani predsjedavajući, uvaženi vijećnici, gosti i mediji, sve vas skupa pozdravljam.

Dozvolite mi da kažem nekoliko uvodnih napomena vezano za Izvještaj o štetama i podsjetim na ono što nas je zadesilo sredinom maja i dalje.

Kao što ćemo pamtiti 15. juni ove godine po prvom nastupu i dobroj igri naše reprezentacije na prvenstvu u Brazilu i kvalifikaciji rukometne reprezentacije na Svjetsko prvenstvo slijedeće godine u Kataru - tako ćemo pamtiti 13. maj i kasnije po katastrofi koja je zadesila gotovo čitavu zemlju i našu općinu.

Da podsjetim: Velike padavine započete 13.05. i nastavile narednih dana, dovele su do neviđenih poplava i izlivanja Spreče, Sokoluše i drugih rječica i potoka. Voda na brani je dodatno osložila situaciju. Došlo je do prekida napajanja električnom energijom većeg dijela općine, nestankom vode, plavljenja oko 170 stambenih i 37 poslovnih objekata, preko 800 hektara poljoprivrednog zemljišta, krenula su klizišta, rušene kuće, prekinuti putevi, vodovodi i dr.

Proglašeno je vanredno stanje i Općinski štab civilne zaštite se stavio u funkciju rukovođenjem odbranom od poplava i klizišta.

Angažovana je gotovo sva raspoloživa mehanizacija i vatrogasna jedinica, ljudstvo, radnici

poplavljenih i ugroženih firmi, građani u mjesnim zajednicama i dobrovoljci (u cilju odbrane i sprečavanja većih šteta).

Sanirani su i prosijecani putevi, mostovi, sprečavano širenje klizišta, izmiještani ugroženi građani, uporedo su formirane ekipe koje su zajedno sa stručnim licima obilazile teren, davale upute i evidentirale stanje koje nam je polsužilo za preliminarni izvještaj o štetama.

Rekao sam na početku izlaganja, samo da podsjetim na dešavanja od 13. maja i o tome neću više. Detalje smo imali u informaciji sa prošle vanredne sjednice.

Reći ću još par rečenica o štetama i izvještaju koji je pred vama.

Opštinska komisija za procjenu šteta je u skladu sa načinom i procedurom utvrđivanja šteta od prirodnih i drugih nesreća regulisanom Uredbom o jedinstvenoj metodologiji i na osnovu izvještaja šest stručnih komisija koje su više od mjesec dana bile na terenu sačinila jedinstveni izvještaj prema kome su ukupno procijenjene štete na općini 44.640.678,94 KM, a odnose se na:

1. Oštećenje objekata saobraćaja i infrastrukture 3.757.000,95 KM.
  - a) Štete na putevima od klizišta 3.237.775,00 KM.
  - b) Štete na putevima od poplava 97.200,00 KM.
  - c) Štete na mostovima 423.000,00 KM.
2. Oštećenja građevinskih objekata 9.432.360,32 KM.
  - a) Oštećeni objekti od klizišta 8.502.320,52 KM.
  - b) Oštećeni objekti od poplava 930.039,80 KM.
3. Štete od klizišta i poplava na poljoprivrednim kulturama i zemljištu 14.144.595,00 KM.
  - a) Štete na poljoprivrednim kulturama 3.388.430,00 KM.
  - b) Štete od klizišta na građevinskom, poljoprivrednom i šumskom zemljištu 10.756.165,00 KM.
4. Štete na vodoprivrednim objektima 5.961.200,00 KM.
  - a) Vodotoci-čišćenje i regulacija 5.859.000,00 KM.
  - b) Vodoobskrbeni objekti, instalacija i oprema 102.200,00 KM.
5. Preduzete mjere na sprečavanju zaraznih bolesti 91.245,00 KM.
  - a) Dezinfekcija stambenih objekata (JZU Dom zdravlja) 52.000 KM.
  - b) Dezinfekcija privrednih objekata (JP Veterinarska stanica) 35.525,00 KM.
  - c) TVJ Gračanica 3.290,00 KM.
  - d) JP Komus 630,00 KM.
6. Troškovi odbrane od prirodne nepogode 298.483,62 KM. Dakle to je ono što je do sada uloženo u sprečavanje, popravke itd.
7. Štete na industrijskim objektima 10.954.820,00 KM, od toga su:
  - a) Direktno štete (na objektima, sirovinama, robi) 5.308.720 KM.
  - b) Indirektno štete (izgubljena dobit, kašnjenje u isporuci i slično) 5.646.100,00 KM.

Kako to nalaže pomenuta Uredba, koju sam spomenuo, na Izvještaj o štetama svoje mišljenje daje i Općinski načelnik i to mišljenje imate u prilogu.

Vidjeli ste da su štete ogromne, da prevazilaze naše mogućnosti, te ćemo morati tražiti pomoć od viših nivoa vlasti, donatora i na drugi način obezbijediti sredstva da bi vršili saniranje.

Moram se zahvaliti svima koji su dali svoj doprinos u odbrani i sprečavanju još većih šteta: Opštinskom štabu civilne zaštite, mjesnim zajednicama i građanima, firmama koje su radile na terenu, Crvenom križu, Veterinarskoj stanici, Domu zdravlja, Policijskoj upravi i drugim. Pohvale zaslužuju i stručne komisije koje su svo ovo vrijeme i vikendom bile na terenu.

Predlažem Općinskom vijeću da usvoji zbirni izvještaj i da ga zajedno sa zahtjevom za pomoć uputimo na više nivoe vlasti i donatore.

I za kraj:

Sve ovo što smo uradili mislim da smo dobro uradili ali tek sada predstoje poslovi. Valja ljudima pomoći da prave kuće, valja sanirati puteve, klizišta, odrone i drugo. Bit će to dug i mukotrpan put, ali se ja nadam da ćemo smoći snage zajedno sa donatorskim sredstvima da polako krenemo u to. Hvala.”

Učesnici u diskusiji su:

Mirza Omerdić:

“Evo ja bih malo prokomentarisao ovaj izvještaj, jer sam bio svjestan onako i vizuelno prisustvovao svemu tome i utvrdio da će štete biti jako velike, ipak me ova cifra iznenadila. Ni ja nisam baš očekivao da će to biti toliko. Htio bih se referirati na ovo što načelnik kaže, sada tek predstoje poslovi. Ono koliko znam jeste, da je jedna Općina Doboj Istok jako puno uradila i radi na pomoći stanovništvu. Recimo Doboj Istok je već poduzeo određene mjere i svim stanovnicima poplavljenih kuća podijelio po 3.000,00 KM. Švedski ambasador je donirao prečistač vode u vrijednosti 200.000,00 KM. Poplavljena kvadratura poljoprivrednog zemljišta namirena je sjemenom, gnojivom i đubrivom. Dakle, Doboj Istok se dobro organizovao tako da je vrijeme da i mi počnemo već sada tražiti pomoć. Oni su nas malo u tome preduhitrili, ali agilnijim i agresivnijim nastupom kod viših nivoa vlasti tražili su novac. Mi imamo dakle na našoj općini puno problema, imamo probleme koje smo stavili u drugi plan, ne smijemo to zanematiti, to su dakle oni socijalni nemiri, “Grafopak”, “Kokaproduct”. Druga stvar, imamo u dosta teškoj situaciji stanovništvo koje nema uslove. Drugo, tu je industrijska zona koja je pretrpjela i najviše šteta, recimo možda čak, ja nisam čitao podatke ali vjerujem s obzirom da je koncentracija građaničke privrede velika i sva je poplavljena i možda su tu štete u svim dijelovima BiH ponajveće. Ja sam prisustvovao i sastanku Udruženja poslodavaca koji su pokrenuli inicijative ka višim nivoima vlasti. Jedna je inicijativa, za koju smatram da je i ovo vijeće treba podržati, jeste upućivanje inicijative da se kod kantonalnih i federalnih nivoa prilikom podjele sredstava isključiv kriterij stave ove elementarne nepogode, dakle ona privreda koja je pretrpila elementarne nepogode da bude dio ovog kriterija. S druge strane imamo i neke stvari koje mi možemo, dakle Vijeće, da administrativne stvari kao npr. komunalne takse i slično. Firma “Isowud” je bila jako potopljena, dakle primoran je i ima namjeru da seli na drugu lokaciju. Čovjek ima velike štete i nema sredstava, a mi možemo da mu pomognemo u onome u čemu možemo, kod građevinske dozvole, smanjimo komunalnu taksu. Isto tako da intenziviramo naš uticaj prema Upravi za indirektno oporezivanje i višim nivoima vlasti i da se aktivnije uključimo u svu tu pomoć. Uputio bih načelniku i jedno pitanje, kakva je situacija sa pomoći na općini Gračanica, da li to teče i dalje, da li to teče predviđenom dinamikom, koliko smo mi pomoći prikupili u tom smislu i koliko je ta pomoć dostatna za saniranje ovih elementarnih šteta?”

Odgovor je dao Općinski načelnik, Nusret Helić:

“Ja nisam pričao o tome šta smo mi radili, šta radimo, koliko pomoći stiže, zbog toga što je danas predmet rasprave Izvještaj o štetama koji u skladu sa metodologijom mora usvojiti ovo vijeće. Imat ćemo priliku odmah, možda već i na sljedećoj sjednici razmatrati sve ono što se čini. Ali u ovom momentu evo reći ću par rečenica. Dobili smo i mi za poljoprivredu, sjeme koje su podijelili, dio đubriva. Crveni križ i Centar koga smo formirali, jer smo željeli da sve pomoć ide preko Centra pri Općinskom štabu. Ima dovoljno hrane u ovom momentu i preko Crvenog križa se snabdijeva svo stanovništvo koje je ugroženo tako da tu nema problema. Mi još nismo utvrdili prioritete, a rekli smo dakle, kad evo danas usvojimo Izvještaj valja ona komisija u kojoj će biti i vijećnici, odnosno predstavnici stranaka, utvrđivati prioritete i kod gradnje objekata i kod svega drugog. Mi para nemamo dovoljno, evo rebalans će ići u tom smislu, tako da ćemo morati raditi po prioritetima. To da li je Doboj Istok dobio, nije sigurno dobio od viših organa pare, nego koliko smo i mi dobili. Znao da smo i mi do sada dobili 50.000,00 KM ukupno, od Kantonalnog štaba Civilne zaštite i od Vlade. Poslali smo na sve adrese i očekujemo ovih dana od Vlade Federacije BiH jer smo među prvima poslali detaljne izvještaje za svaki porušeni objekat, za sve ovo što nas je zadesilo tako da, možda nas nema puno u medijima jer smo se fokusirali na objekte koji su poplavljeni, ali evo vidite ovo su stvarne prave štete, a evo tu su i predstavnici komisija. Dobro je Mirza rekao, kad niste tamo na terenu ne možete ni shvatiti koji je obim šteta. Treba otići u sve MZ-e i vidjeti i onda svi sigurno neće sumnjati u ovo što jest. Ovo su ogromni izdaci, ogromne štete, kako ćemo iz toga izlaziti, ali sigurno ćemo morati po prioritetima, prvo ljudima kuće obnavljati, a onda stvarati prostor za ostalo. Dakle, što se tiče humanitarne pomoći ona dolazi u Centar i Crveni križ i dovoljno za sada to funkcioniše i ubuduće ne vjerujem da će to doći u pitanje. Nisam sve ovo pričao u detalje zbog toga što treba prvo da usvojimo Izvještaj, pa da onda pravimo

planove i krećemo na jedan puta koji je težak, koji neće biti brz. Ja znam da su ljudi već sad shvatili šta im se desilo i logično prvo vrše pritisak na nas, a nama valja tražiti načina za rješavanje. Formirali smo i poseban račun, tako da ćemo mrati vući neke poteze. Prvo će biti evo, uposlenici da se odreknu jedne dnevnice, a nakon toga ćemo tražiti i druge načine i poduzimati mjere.”

Safet Pjanić:

“Evo ja ću ovaj puta, kao samostalni vijećnik, zaista dati punu podršku ovom izvještaju i da kažem da ću na sljedećoj sjednici pristupiti jednom od klubova tako da neću više biti NN nego ću biti ZN i znat će se tačno ko sam i šta sam, je li to zakonito ili nije zakonito, tako da ćemo to riješiti vrlo brzo. Kad je u pitanju ova informacija koju je ponudio načelnik, ja ću reći sljedeće. Da je šteta na našoj općini iskazana zaista velika i ja nisam očekivao da će to biti 45 miliona maraka i zaista ja moram vjerovati komisiji. Komisija je svoj posao kako treba odradila i da se zaista moramo svi angažovati da se ove stvari, što kažu sad u ovom postratnom periodu što je moguće više saniraju. Moja osnovna primjedba, jer sam bio svo vrijeme kao privrednik na terenu je to da se Gračanica sigurno nije snašla za vrijeme poplava i poslije poplava. Za vrijeme poplava bio sam sa gospodinom iz Isowuda koji mi je rekao da je tražio dvije pumpe, koji je imao poplave već prije i koji zna kako treba raditi, međutim nije se mogla naći koordinacija između Vatrogasnog doma i Centra za civilnu zaštitu. Da se nije snašla govori sam trošak JP “Komus” 600,00 KM, to da je upalio dva auta 600,00 KM. Znači “Komus” nije ni radio kad su bile poplave. “Komus” je trebao imati daleko veće troškove da je znači imao angažman. Drugo, po meni da je Gračanica apsolutno nepokrivena bila u vrijeme poplava. Samo se govorilo o Maglaju, Doboju i Šamcu. Gračanica je imala tako velike štete i moralo se medijski više pažnje pokloniti Gračanici. Štete su na privrednim objektima ogromne, neću da govorim kakve su indirektno štete. A i njih je itekako bilo. Gospodin Šabić nije poslao uzorke zato što nije bilo struje. Ali to ćemo drugi puta da kažemo, da su to stvari koje su stale iz drugih nivoa, iz Tuzle i moglo se to riješiti na drugi način tako da bi i privreda mogla proći daleko bolje. Ne trebamo tu svar da zataškavamo, da kažemo da je tako ili nije tako. U susret privrednicima koji su imali direktne štete su stali da kažem trećerazredni ljudi, ljudi koji nemaju ingerencije. Mislim da je načelnik trebao da bude čovjek koji vodi svaku ekipu i da obiđe svako preduzeće koje je imalo štetu i da tamo razgovara sa ljudima. Mislim da je stvar bila vanredna i da se trebalo tako i raditi. Treba inicirati u Vladi Kantona i Ministarstvu da treba prioritet dati privredi, ljudima koji su imali štete jer to je po meni najvažniji prioritet, vratiti ljude na posao, odnosno vratiti poljoprivrednike na zemlju. Put treba napraviti do kuće i normalno onima koji nemaju stambene jedinice, odmah pristupiti tim prioritetima. Možda treba napraviti još jednu komisiju koja će raditi vrlo brzo, do rebalansa budžeta koji mora bit takav i te stvari dobro postrojiti. Ja sam se kao čovjek angažovao i otišao sam u Njemačku da pokušam naći pomoć od svojih partnera za radnike “Fortune” koji su stradali u ovom belaju. Četiri su radnika u “Fortuni” izgubula kuću. Tri u Lukavici, jedan u Prijekom Brdu. I ljudi su mi obećali, doći će dvadeset četvrtog, podijelit ćemo to u kovertama direktno ljudima u ruke. Tako oni hoće i to je za mene sasvim uredu, a to će biti popraćeno i medijski da se vodi briga o ljudima. Pomoć će biti skromna, ali svaka pomoć je dobro došla. Možda bi trebalo na sljedećem vijeću, kad bude redovna sjednica pokrenuti inicijativu da se bar odavde kroz izmjenu zakonske regulative pomogne ovim ljudima i privrednim subjektima. To je za mene najvažnije, to je sve realni sektor, ljudi se bave proizvodnjom, da pokušamo pomoći kroz promjenu zakonske regulative kad je u pitanju porezi i doprinosi i dati možda ljudima malo daha, a ne da im dolazi finansijska policija kad je blato do koljena u firmama. Mislim da je to jedna velika sramota, da Općinsko vijeće mora da osudi ovakvo ponašanje te birokratije. Sramotno je da finansijska policija dolazi firmi “Helioplast”, a blato do koljena. Ljudi se bave i brinu kako će spasiti mašine, kako će to uraditi, možda nemaju dokumentacije, svi su softveri u vodi, a oni su došli da prave zapisnike. Mislim da to treba javno osuditi. Evo ja ću na idućoj sjednici predložiti da Vijeće pokrene inicijativu da se vidi ko je dao nalog i da se javno prozove i osudi za takvo ponašanje. Na kraju, evo neću puno da pametujem, ali želio bih da se, prije svega, ukoliko bude sredstava, po meni pomogne privredi i poljoprivredi, normalno malo prije sam rekao i za stambene jedinice. Put se mora napraviti, a šta je on malo grbav može sačekati, a da se ide na ovo da se ljudi vrate na posao, da se probudi život ljudi. Tamo su radnici, njihove porodice i mislim da bi to bilo jedno, po meni veliko rješenje.”

Dino Dedić:

“Što se tiče Izvještaja želim da ga pohvalim i da kažem da je stvarno dobro urađen. Međutim, imam neke prijedloge ili neke dodatke. Što se tiče Izvještaja, prijedlog LDS-a je da ga treba usvojiti uz zaključak da se u roku od deset dana izvrši dopuna izvještaja zbog šteta koje su se pojavile naknadno ili zbog izostavljanja nekih šteta od strane popisne komisije. Tako možemo navesti evo dopunu izvještaja sa sljedećom stavkom, kanalizacija u Džakulama, naselje Rijeka. Znači kanalizacija je oštećena na dužini od stotinu metara na lokaciji kod pilane Hodžić Hidajeta. Procjena štete je 5.800,00 KM. Kanalizacija je urađena 2012. godine sredstvima budžeta Općine Gračanica, Federalnog ministarstva poljoprivrede i građana u dužini od 500 metara. Vrijednost urađenog posla je iznosila 29.000,00 KM. Pa pitam sad, zbog čega je ovo oštećenje izostavljeno od strane komisije koja je vršila evidenciju nastalih šteta? To me interesuje. Takođe bih naveo da postoje mnoga druga klizišta, mnoge druge štete u nekim MZ-a koje nisu evidentirane i koje treba evidentirati. Ne možemo praviti u nekim MZ-a sve evidentirano, a u nekim nešto malo. Toliko.”

Rahim Gadžić:

“Klub vijećnika SDA će podržati ovaj izvještaj i da je bogdom da su manje cifre i manje štete na općini Gračanica. Međutim, kakva je situacija, takva je. Međutim, ja bih nešto kazao, niko ne spominje ljude koji su radili na terenu, komisje koje su radile i subote i nedjelje i proveli po čitav dan. Mi koji smo bili zajedno sa njima radili, ja njima čestitam. Obišli su oni sve terene, možda se slučajno negdje desio propust, ali su radili nesebično svaki dan i nijedan dan nisu odmarali. Ujutro su rano u tim MZ-a i do kasno naveče su na terenu. Znači njima čestitam i hvala im puno što su se tako angažovali da pomognemo svim građanima općine Gračanica. Što se tiče prioriteta, mi bi trebali danas poslije usvajanja ovog izvještaja da što je moguće prije formiramo tu komisiju koja će odrediti prioritete i prije rebalansa budžeta, da znamo koliko možemo obezbijediti sredstava rebalansom budžeta i da se što prije proslijedi prema višim nivoima vlasti da nam pomognu da omogućimo svim građanima općine Gračanica da mogu doći prvenstveno do svog doma. Zatim oni koji su iseljeni iz svojih domova da im to pokušamo riješiti, jer brzo će proći vrijeme i doći će jesen i zima. Zato treba maksimalno brzo pokušati rješavati probleme ljudima koji su ostali bez svojih kuća. Zatim trebamo još i razmisliti, a ja sam to nekoliko puta ponavljao, da za mnoga poljoprivredna imanja putevi su zakrčeni i ne prolazi se. Znači, trebali bi da vidimo gdje su velika poljoprivredna imanja, da pokušamo ljudima otvoriti puteve ukoliko je moguće. Sad je sezona kad ljudi prikupljaju hranu za stoku, kupe sijena, kukuruzi su u pitanju, pšenica i slično. Ima negdje gdje se ne može doći ni da se požanje pšenica. Znači trebalo bi pomoći poljoprivrednicima, jer znamo svi da baviti se poljoprivredom je jako težak posao. Nema težeg posla i ako im još mi ne pomognemo, vjerujte sve je manje ljudi koji se bave poljoprivredom i koji žele uzgajati stoku. Iz tog razloga komisija koju bude imenovao Općinski načelnik treba da prvenstveno povede računa oko ovih stvari. Da ne bude kasno, ako budemo ljudima pomagali i otvarali puteve prema njihovim imanjima tamo u jesen, vjerovatno će to biti kasno. Treba dobro razmisliti i oko tih stvari da pomognemo ljudima. Toliko i hvala.”

Vehid Osmanović:

“Klub vijećnika SDP-a će podržati ovu odluku. Nažalost i mi smatramo da su štete ogromne, da trebamo napraviti što hitnije prioritete, kako bi ljude do zime smjestili na neka njihova, a ne privremena ognjišta i povezali sve putne infrastrukture. Takođe moramo voditi računa, evo što je i kolega Pjanić rekao, o zaštiti radnih mjesta, jer mislim da i Gračanica gubi radna mjesta kao i druge općine koje su pogodile ove elementarne nepogode. Isto insistiram da se što prije oformi komisija i poredaju prioritete.”

Almedin Devedžić:

“Evo ja bih tragom diskusija svojih prethodnika. Dakle, slažem se da treba formirati što prije komisiju koja će odrediti prioritete. Ja bih ovdje otvorio diskusiju, ne znam da li je ovdje mjesto. Slažem se sa Izvještajem, podržat ćemo ga, kao što je naš predsjedavajući kluba rekao. Možda bi trebalo otvoriti priču kada će se to raditi jer život teče dalje. Mi nemamo vremena da čekamo, misleći na MZ-u Lukavica, koja je nažalost izvukla najdeblji kraj, poštujući sve ostale.

Možda bi bilo dobro otvoriti priču šta se uradilo u tom vremenu. Vjerujte mi i dan danas vodimo bitku sa ovim problemima koji su nas zadesili tamo. Prije dva dana smo odblokirali deset kuća koje su bile sa dvije strane klizišta. Imamo jednu porodicu sa djetetom sa posebnim potrebama. Dakle, mi svaki dan vodimo bitku tamo i pitam se kad ćemo dobiti konkretniju pomoć. Šta se tamo dešava. Mi smo za ovih tridesetak dana dosta toga i uradili, popravili, ovo nije nikakva hvala nego smo premoreni, jer život teče dalje i ljudi ne mogu čekati. Ja sam evo u neformalnom razgovoru zamolio načelnika da ove dane koje je mašina radila tamo, da se i ona tim nalozima pokrije. Nadam se da će to sve biti uredi, obzirom da je stvarno posla dosta urađeno u Lukavici. Takođe evo pominjem i komisiju koja je radila tamo na terenu, svaka čast. Odradili su posao uspjeli su da popišu najveći dio šteta. Ne znam da li su svi konkretno informisani vezano za to, ali vi znate da su tamo četiri kuće potpuno porušene i da su ljudi negdje kod rodbine. Ono što je prioritet u Lukavici je da se tim ljudima obezbijedi smještaj, odnosno trajniji smještaj kao što su i kolege ranije govorile. Evo vidim ovdje koliko je štete. Vidite da je najviše štete otprilike u Lukavici i Donjoj Orahovici. Mislim da bi trebalo u tim mjestima odmah reagovati. Prekinuta je glavna komunikacija koja veže čitavu mjesnu zajednicu. Vidite šteta je 1.276.000,00 KM. Mi smo svojim snagama, naravno uz pomoć Općine, svojim snagama skupili oko 30.000,00 KM. Dakle narod Lukavice uz pomoć Vijeća MZ-e je skupio ta sredstva, nešto u novcu, nešto u mašinama tako da smo uspjeli da tri prekida, na tri mjesta gdje je prekinuta komunikacija uspostavimo saobraćaj. I mogu da kažem da smo prije dva dana spasili deset kuća, da mogu ljudi da izađu, jer nisu mogli da izađu nigdje. Uspjeli smo da saniramo jedno veliko klizište, znači do njega može auto da dođe. Prebacili smo preko hiljadu kubika zemlje, očistili put. Uspjeli smo takođe da saniramo još dva prekida u komunikacijama, postavljanjem novih kanala, novih cjevovoda koji su bili polomljeni, jednostavno ih nije bilo. To smo uspjeli da uradimo. Uspjeli smo da probijemo alternativni put i deblokirali hiljadu ljudi i u mahalama i podružnicama Prnjavor, Bijeli Potok. Dakle sad se i do njih može doći. Dakle za ovih mjesec dana mnogo stvari smo uradili, ali nam treba pomoć. Želim ovom prilikom da iskoristim ovu govornicu, da skrenem pažnju svima onima koji mogu da pomognu, da je Lukavica zbrinuta, da smo deblokirali sve ljude, da pratimo humanitarnu situaciju sa iseljenim. Pratimo i zahvaljujući donatorima Crvenom križu i ostalim. Pratimo ih sa paketima hrane, znamo dobro i tačno gdje su i koliko ih ima. U neke kuće su se ljudi vratili. Ja nemam nekakvo pismeno odobrenje šta ćemo s njima, oni su se vratili na svoju odgovornost. Što se tiče riječnog korita i ono je jednim dijelom, na najugroženijem dijelu onako za prvu pomoć sanirano. U toku je spašavanje jedne kuće koja je ukoliko se ne sanira, prva poplava će je odnijeti. Dakle, pokušavamo da je spasimo. Ono što nam je sad najpotrebnije da saniramo jedno klizište koje je ostalo, najveće klizište u mahali Prnjavor. I evo ja bih pozvao, sve one koji mogu da pomognu da se to što prije ubrza i komisija koja bude formirana da se posebno obrati pažnja na to. Takođe i manje putne komunikacije koje su nam na granici prekida, njih održavamo i takođe su i one prioritet. Voda nam je problem i znam da je voda i u ostalim mjestima pokidana, ali vodovodi u Lukavici kojih je najviše u zoni klizišta su oštećeni i evo ovdje vidim da je to uvršteno u procjene šteta i nadam se da ćemo uspjeti dobiti taj repromaterijal i da pokušamo da saniramo, obzirom da imamo najviše oštećenja na glavnom vodu na koji su priključeni osnovna škola i ambulanta. Dakle prioritet nam je gradnja ove četiri kuće i nadam se da ćemo krenuti odmah u te aktivnosti. Sa terena sam dobio informacije kako sam trebao da se zahvalim pojedincima ili grupama ili ne znam više kome. Ja sam se zahvalio svima koji su uopšteno pritekli u pomoć MZ-i Lukavica, onda kad nam je bilo najpotrebnije. Sigurno u narednom periodu će biti konkretnizovana i imena i prezimena i firme, međutim borba u Lukavici još nije završena. Očekujemo pomoć i dalje. Zamolio bih sve one koji su pomogli da imaju razumijevanja, neće Lukavica zaboraviti one koji su joj pomogli onda kad je najpotrebnije. Dakle, molim vas kada budemo pravili prioritete da stvari koje se dešavaju u Lukavici uzmemo ozbiljno u obzir i da pokušamo te prioritete kao i u Gornjoj Orahovici i ostalim MZ-a da isprofiliramo kako bi ih mogli što prije rješavati. Hvala.”

Fadil Mešić:

“U ovom izvještaju smo se bavili mjerama za otklananje posljedica prirodne nepogode koja je zadesila i općinu Gračanica. Međutim, ovdje treba kratko spomenuti i mjere za sprečavanje mogućih i budućih prirodnih nepogoda. Gospodine načelniča, Agencija Sliv rijeke Save je

obavezna za čišćenje korita rijeke Spreče. Oni to do sada nisu činili ili su vrlo malo uložili, općine Lukavac i Doboj Istok na koritu rijeke u dužini možda 200 metara. To je kameni zid koji je evo u ovim poplavama i stradao u Doboj Istoku. U Lukavcu to nije. Konkretno znači, primorati tu agenciju kod raspodjele novčanih sredstava, obavezno čišćenje korita rijeke Spreče. Inače i buduće višednevne kiše, kojih će vjerovatno biti, će ponovo poplaviti. Moramo znači nešto naučiti. Predložio bih da svi nivoi vlasti, uzevši kantonalne vlade, Federalnu, Vijeće ministara, zašto da ne, da se odreknu skupocjenih automobila koje voze i da za to bar svaki kantonalni štab civilne zaštite ima jedan helikopter i nekoliko čamaca. Bez toga ćemo ponovo doći u istu situaciju, ponovo kukati i tražiti sva opravdanja, a samo ne u sebi ništa. Toliko i hvala.”

Admir Gazibegović:

“Ovaj izvještaj je dobar, samo čini mi se da fali. Koliko ja znam juče smo mi u Orahovici, što se tiče poljoprivrednog zemljišta predali spiskove. Mi smo iz dobre namjere preuzeli obavezu da kao MZ-a popišemo sve to, da pomognemo toj komisiji koja je stvarno radila. Ima 270 prijava. Znači, što se tiče Donje Orahovice, fali puno parcela poljoprivrednog zemljišta. Možda to ne bi ni primijetio da nisam vidio cifre koje se tiču Gornje Orahovice i Lukavice. Uz svo poštovanje, ali Donja Orahovica je u slivu rijeke Spreče, znači dole smo poplavljene i 270 parcela, koliko je to hektara ne znam, ali to treba da uđe u Izvještaj. Samo to imam zamjerku. Hvala.”

Nije bilo više prijavljenih članova Vijeća za diskusiju pa je predsjedavajući Općinskog vijeća dao pauzu u trajanju od deset minuta, kako bi Kolegij Vijeća održao sastanak i zauzeo stav.

Nastavku sjednice je prisustvovalo 28 članova Vijeća. I dalje su odsutine Osmić Mirsada i Ahmetašević Jasenka.

Predsjedavajući Vijeća je iznio sljedeće:

“Nakon obavljenih konsultacija želim da iznesem sljedeće. Kad je u pitanju ovaj izvještaj on je živa materija, on će se u narednom periodu svakako dopunjavati i sve ono za što znate da je bila šteta, a da nema u Izvještaju, treba prijaviti kako bi komisija mogla evidentirati i uvrstiti u ovaj izvještaj kad su u pitanju štete. Kad je u pitanju komisija za određivanje prioriteta koja se evo spominje stalno, danas je većina političkih partija odredila svoje predstavnike u ovoj komisiji. Ostalo je i zamolio bih Našu stranku i SBB da do sutra u Stručnu službu Vijeća dostave imena, a ostali politički subjekti koji participiraju u Vijeću već su dostavili imena za komisiju i mi ćemo to dostaviti načelniku da on imenuje komisiju koja će biti daleko veća, proširena sa ekspertima iz raznih oblasti.”

Prešlo se na izjašnjavanje po predloženoj Odluci.

Odluka o usvajanju zbirnog izvještaja o procjeni nastalih šteta od prirodne nepogode - poplava i klizišta na području općine Gračanica u periodu 05. 05. 2014. do 16. 06. 2014. godine, usvojena je jednoglasno sa 28 glasova “ZA”.

Vanredna sjednica je završena u 12.20 sati.

Zapisnik vodila: Mevlida Naimkadić

Tonski snimak sjednice uredno je arhiviran.

Mevlida Naimkadić

**PREDSJEDAVAJUĆI  
OPĆINSKOG VIJEĆA**

mr. sc. Edin Ibrišević